



31. marts 2026

UPA 2026/151

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

**Meerarsiat meeqqat allat assigalugit feriarnissaminnut, ilaqutariittullu inuunissaminnut periarfissaqarnissaat qanoq sulissutigisinnaaneripput pillugu, apeqquteqaat aallaavigalugu oqallinnissamik siunnersuut**

(Inatsisartunut ilaasortaq Pipaluk Olsen, Demokraatit)

Aningaasatigut, paragraffitsigullu nalilerneqarsinnaanngitsumik, meeqqalli inuunerinut aalajangiisumik inuit ilaat sunniuteqartarput. Taakkua ilaagaat angajoqqaarsiaasartut. Meeqqat inuunermi atugarissaarpallaarsimangitsut angerlarsimaffimminnut, ulluinnarminnullu tikilluaqqusarpaat, qanilaarnermillu tunisarlugit. Akisussaaffimmik annertuumik tigusisarput, toqqissisimasimangitsunullu toqqissisimanermik, allanngujaassusermik, qanilaarnermillu tunisarlutik.

Demokraatit isumaqarput, angajoqqaarsiat inuiaqatigiittut nersorlutigit pitsaasunik atugassaqartittariaqarigut.

Attaveqarnerup, misigissutsikkullu toqqissisimanerup ineriartortinneqarnerini atassuteqaatit, misigisaqaqatigiinnerit, ilaqutariinnilu ilaasutut meerarsianut qitiulluinnarput. Feria ulluinnarnik qimatsinerinnaanngilaq. Feria peqatigiinneruvoq. Misigisaqaqatigiinneruvoq, eqqissisimaarneruvoq, qanilaarneruvoq, inersimasunngornermilu eqqaamajuagassanik misigisaqarfiulluni. Misigisaqaqatigiinnerit taakkorpiaat meeqqanut sumiginnarneqarsimanut imaluunniit toqqissisimasimangitsunut pitsaanagerusumik inuuneqalernissamut aalajangiisuusinnaapput.

Angajoqqaarsiat meerarsiatik ilagalugit feriarnissaminnut ullumikkut periarfissaat kommunimit, kommunimut assigiinngitsutigut iliuuseqarfigineqartarput. Imaappoq, meeqqat feriarnermi misigisaqaqatigiinnissaminnut periarfissaqarnerini meeqqamut pitsaanerpaaq apeqqutaatinnegarani, nunami sumi inissinneqarfik apeqqutaasoq. Tamanna ilumoorsinnaanngilaq.

Meeraq angajoqqaarsianut inissinneqaraangat, ilaqutariittut inuunerup misiginissaanik periarfississallugu siunertaarpiartarpoq. Feriarnermi misigisassat taamatulli ipput. Feriarnermi meeqqat atugarissaanissaannut, attaveqarnerinut, allanngujaatsumillu atugaqarnissaannut pitsaasumik sunniuteqarsinnaasut Naalakkersuisut namminneerlutik tikkuareernikuuat. Naliliinermut tassunga Demokraatit isumaqataapput.

Ilutigisaanik angajoqqaarsiat suliassamik annertooujussuarmik kivitsererput. Meerarsiap feriaqatiginerani aningaasartuutaasinnasunik aamma nammatsinissaat naleqqutinngilaq. Illumut feriarsinnaassanerlutik nalorninissaat aamma naleqqutinngilaq.

UPA 2026/151

J.nr 01.25.01/26FM-LABU-00151

Qupp. 1 af 2



# DEMOKRAATIT

Malittarisassat massakut taamak itsillugit, feriarnissaq kommunit ataasiakkaat aamma angajoqqaarsiat isumaqatigiissutigisarpaat<sup>1</sup>. Isumarput malillugu naligiissitsineq, naapertuilluarneq, inuiaqatigiillu akisussaanerat pillugit tamanna tunngaviusunik arlalinnik apeqquteqalersitsivoq. Allatut imak oqaatigalugu; meerarsiat meeqqat allat assigalugit feriarnissaminnut, ilaqtariittullu inuunissaminnut periarfissaqarnissaannut qitiusumit qanoq iliorsinnaavugut? Pisinnaatitaaffeqarnermilu sumi nunami najugaqarneq apeqqutaajunnaarsillugu malittarisassat assigiinnerulernissaat qanoq qulakkeersinnaavarput?

Tamanna pillugu Demokraatit isummaminnik saqqummiussiniarput. Isumaqarpugut angajoqqaarsiat meerarsiatik ilagalugit akiliunneqarlutik ukiumoortumik feriarnissaannut nunami ersarissumik, assigiimmillu pisinnaatitaaffeqqassasut. Pisinnaatitaaffiup taassumap, pisortani aamma namminersortuni sulisunut feeriarnissamut akiliunneqarlutik angalasinnaaneranut tunngaviusumik tunngaviit assingi malissavai.

Naalakkersuisut, Inatsisartullu isummamut tassunga qanoq isumaqarpat?

Naalakkersuisut paasisutissiissutiginikuuaat, isumassarsiaq taanna ukiumut 14,3 million koruuninik naleqassasoq, ilutigisaanillu nalilerlugu, assersuutigalugu kommunit allaffissornikkut nammataannut annikillisaataasumik ersarissunik, assigiisaartunillu malittarisassaqluni feeriarnissamut akiliunneqarluni angalanermut aqqiissuuseriaatsini atuuttuni tunngaviit assigalugit aqqiissut pisariitsumik, allaffissornikkullu suliariuminartumik ilusilersorneqarsinnaasoq<sup>2</sup>.

Sammissamut pingaaruteqartumut tassunga partiit sinnerisa, Naalakkersuisullu isumaasa tusarnissaannut qilanaarpunga, neriullungalu angajoqqaarsiat feriarnissaminnut periarfissagissaarnerusinnaanissaat qanoq sulissutigisinnaaneripput pillugu ammasumik, kinguneqartussamillu oqallissinnaassalluta.

---

<sup>1</sup> Ilaqtariit paarsisartut pillugit Namminersorlutik Oqartussat nalunaarutaat nr. 13, 10. oktober 2019-imeersoq

<sup>2</sup> § 37 naapertorlugu apeqqummut normu 005/2026-mut akissut